



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8 Yangia anidakangma : Tir Yimym tir_yimym

tir yimym TAPAK 7



Antoine Griezmann international football asaya nungi anener



Imran Khan anema ano ken o tasen benokogo

VOL. XXI ISSUE NO. 349 (ADOK 349) DIMAPUR SANGTENNÜ (TUESDAY)

MONGPUTENI (OCTOBER) 01, ₹ 5.00

DYRS-i Naga lanurtem arangshir

Kohima, September 30, 2024 (TYO): Directorate of Youth Resources and Sports (DYRS)-i Hombar nungi Pradhan Mantri Kaushal Vikas Yojana (PMKVY) 4.0 Training tenzukogo.

District balala nung lanur 218 tashi skills asem- Mobile Phone Hardware Repair Technician, Drone Service Technician aser Assistant Installation Computing & Peripherals atema training agir.

Iba sentong nung YouthNet aser NagaBots-i training partners ama shilem agir aser YouthNet nung anogo 75 days training agitsü.

Tanü YouthNet office nung Secretary YRS Anthony Ngullie-itetushi süa jaoker ama iba training tenzuk.

Tanü technology aser Artificial Intelligence (AI) putu nung nisungtemi technology memeteti liyonga moutettsü kechiyong AI ajanga tiyazü kato shitak kümdaktsür, ta pai ashi.

"Nagaland nung zünger mapa manguba khuret tuluba akümer aser küm shia tanur meyirjang aika school-i aoer aser kaketshir aika college züngtemer. Iba asoshi asenoki lanurtem nem skills sayutsüla aser iba ajanga parnoki sorkar aser nija sectors nung mapa anguba nung yariteptsü" ta Anthony Ngullie-isa ashi.

"Naga lanurtem dak nungi

mapa inyakba samaa aoer aser parnoki skilled work meinyaknür. Asen lanurtemi alizüng tululu ayur saka ibaji metongteter anungji iba amala skill development training programme ajanga lanurtem yaritsü" ta pai ashi.

PMKVY ya lanurtem skilled work-i anitsü atema mapatong ka lir. Iba ya mapang lemsar agiba sentong ka lir anungji lanurtemi tajungba angazüksü atema süoki ia training agitsüla ta Ngullie-isa ashi.

"Naga lanurtemi skills ashitsüla aser kechi maongka ngudir mapa inyaktsü renema alitsüla. Sorkar mapatem ajanga rongsenketzüng nung shilem balaka magir saka entrepreneurship aser business ajanga dang agir" ta YRS Director Kethosituo Sekhose-i ashi.

"State sorkari rongsenketzüng renloksü atema entrepreneurship benar arutsü meranger. Department-i training programme ya tang atema pilot project ka ama tenzükdanger aser jungra maneni inyaka aotsü" ta pai ashi.

PMKVY ya Ministry of Skill Development and Entrepreneurship (MSDE) kübok inyaker aser iba ajanga linük nung lanurtem industry-relevant skill training agidaktsüsü nikjidong lir.

Nirmala Sitharaman-i NE nung regional rural banks asadang



Guwahati, September 30, 2024 (Agencies): Union Finance Minister Nirmala Sitharaman-i Hombarnü Arunachal Pradesh sendangi arua lir aser tanü Itanagar nung tongtipang sentong ka ayonga menogo.

Northeast state 7- Arunachal Pradesh, Assam, Manipur, Meghalaya, Mizoram, Nagaland

aser Tripura nung regional rural banks inyaksangshi asadangtsü atema Sitharaman-i senden amen.

"Regional rural banks ajanga yimtsüng rongsenketzüng nungiter anungji bank temi sorkar schemes asoshi beneficiary tem jangjaba mapa nung temulung agütsüsüla" ta lai ashi.

Laisa rural banks dang

ground-level agricultural credit disbursement asoshi shilem tuluba agitsü tetuyuba agütsü.

Yimtsüng tia nung alirtem tashi itdaktsüsü atema rural bank temi horticulture aser piggery, poultry aser dairy & fisheries dena allied activities nung temulung agütsüsüla ta Union Finance Minister-isa tetuyuba agütsü.

Kohima nung AB-PMJAY aser AB-DG atema sentong agi

Dimapur, September 30, 2024 (TYO): Ayushman Bharat Pradhan Mantri Jan Arogya Yojana (PMJAY) tenzükür küm 6 ajungba aser ano Ayushman Bharat Digital Mission (ABDM) tenzükür küm 3 ajungba sentong ka Kohima nung mongogo.

Iba sentong ya Kohima Deputy Commissioner office nung September 30, 2024 nü ayongzuka agiogo.

Kohima Additional Deputy Commissioner Rhosietho Nguori, NCS-i tesentepertem pelaa agizuka jembidang sorkari accessible healthcare agütsüsü atema mapa inyakba lemsatop.

PMJAY aser iba dak sendakba Ayushman Bharat Digital Mission amala maparen tenzükba ya United Nations indang sustainable development goals atongtsü atema lir, ta Rhosietho Nguori-i ashi.

Sentong nung Deputy Chief Medical Officer, Kohima, Dr. Imchatoshi-i Ayushman Bharat Pradhan Mantri Jan Arogya Yojana indang osang lemsatop.

PMJAY ya health insurance coverage lir aser kibong ka nem

küm shia secondary aser tertiary healthcare atema Rs 5 lakhs agütsür ta pai ashi.

PMJAY ya India nung sensaker kibong crore 10 tema nem empaneled hospitals nung free & cashless healthcare services agütsüsü atema tenzükba lir ta Dr. Imchatoshi-isa ashi.

Külen, Ayushman Bharat Digital Mission ya healthcare systems digitize asütsü nükjidong nung tenzükba lir. Iba ajanga medical records tezübaba reprangteter aser linük ajungalen health services sendakteper ta paisa ashi.

"Kohima district nung iba scheme kübok empaneled public hospitals 4 aser private hospitals 5 lir. Naga Hospital Authority Kohima (NHAK) nung PMJAY kübok registration aser transaction teimtiba lir. Tang tashi nung shiranger 2,558 anepaluogo aser beneficiary 1,601 register süa lir" ta Dr. Imchatoshi-isa ashi.

Chief Minister's Health Insurance Scheme (CMHIS) kübok NHAK nungsa shiranger 1,197 anepaluogo aser

beneficiary 723 register süa lir. Ajsüaka mozü ki aika facilities, equipment, manpower aser infrastructure tajungba akümtsü nüngdaker, ta pai ashi.

Kohima Deputy Commissioner, Kumar Ramnikant, IAS-ia Health Department aser sendaktepa alirtemi Ayushman Bharat PMJAY takok ngua inyaksangshia aruba atema tenüngsang agütsü.

"Ayushman Bharat" ya arishi talang moatsüba ta meyipzüksü akok aser iba ya nisung ajaki quality healthcare angutsü atema tenzükba sentong ka lir ta DC Ramnikant-isa ashi.

Health department-i iba scheme 100% coverage & awareness atongtsü atema inyakba nung yimtsüng aser colony lennirtemi yariteptsü ayongzükür ta paisa ashi.

Iba sentong nung Naga Hospital Authority nem PMJAY kübok "best-performing hospital" sempet agütsü aser beneficiary ana nem Ayushman Bharat scheme cards agütsü.

Manipur nung AFSPA atsülangogo

Guwahati, September 30, 2024 (Agencies): Manipur sorkari October 1 nungi tenzuka ita trok atema Armed Forces (Special Powers) Act (AFSPA) atsülangogo.

Manipur nung police stations 19 kübok tesemtem dak alaka tanüngba tesem ajak nung AFSPA atsülangtsü.

"Tali bilemloka oa inyaksangshiba, telungpur teloktem, law & order aser state sorkar tashi asadanger maneni AFSPA alitsü lemtetogo. Tang atembo Disturbed Area magien tajungba ta sorkari bilemer" ta Manipur Home Commissioner N Ashok Kumar-i ashi.

Arem shidi telok kati nisung ka tepset

Dimapur, September 30, 2024 (TYO): Naga tsür ka arem shidi agi tepsetba sülen ita pezü shi süia arudang ano Hombarnep Karbi Anglong district kübok Daldoli forest nung arishi küm 53 tain tebur ka arem shiditemi tepset.

Tasüsang ya Alemmeren ta jangjaogo aser pa ya Assam den artsüa aliba Indisen nung telidak liasü.

Tanep 4:00 ako meta pa aremi itsük abeni aodang arem shidi telok ka ajurua pa tepset. Iba

tatalokba sülen pa mang benar arua kinunger ket nung agütsüogo ta Indisen Village council ketdangsurtemi ashi.

Tanep 9:00 ako meta yimdaklir kati tasügang angu aser Karbi post nung osang sangokja liasü. Asür Alemmeren ya Süngratsü nung aser pa Indisen nung tebu den liyonga arua liasü. Tanü nikongdang 2:00 ako meta pa den asüpila sentep sentong agir mang remogo.

Maharashtra sorkari nashi nem 'Rajya Mata' jenjang agütsür

Mumbai, September 30, 2024 (Agencies): Maharashtra nung Eknath Shinde-i aniba sorkari nashi nem "Rajya Mata" (State Mother) jenjang agütsüba metetdaktsüogo.

"Asen state nung anguba nashitem ya asen aluyimertem asoshi tajanzük lir. Anungji onoki nashi nem 'Rajya Mata' jenjang agütsüsü lemtetogo.

State sorkarisa Goshalas nung indigenous cows mesüba asoshi teyari agütsüsü" ta Maharashtra deputy chief minister Devendra Fadnavis-i ashi.

State cabinet-i indigenous cows mesüba atema anogoshia Rs 50 subsidy scheme ka tenzüktsü lemtet ta Maharashtra chief minister's office-i metetdaktsü.

"Chief Minister Eknath Shinde menden ser iba senden amen. Goshalas-i sen peria manguba ajanga onoki parnok tashi itdaktsüsü atema lemtet. Iba scheme ya Maharashtra Goseva Commission ajanga inyaktsü" ta CMO sangdong nungsa shia lir.

"Maharashtra kübok district shia nung District Goshala Verification Committee tentettsü. 2019 nung 20 buba animal census agidang indigenous cows 46,13,632 dang liasü aser iba ya kanga ajema akümba liasü. 19 buba animal census dang nungi 20.69% agi tajemba aküm" ta CMO-isa ashi.

"Vedic mapang nungi meimchir taküm nung nashi ya religious, scientific aser

economical lir anungji iba jagi Kamdhenu ta ajar" ta Maharashtra government resolution (GR) nung shia lir.

Nashi mamatzü nung nutritional value kanga lir aser meimchir achiajemba nung kanga tongtipang ta parnokisa ashi.

Marathwada nung devni aser lalkandari, Western Maharashtra nung khillar, northern Maharashtra nung dangi aser Vidharbha nung gavlaui ta nashi tapu balala lir.

Iba government resolution (GR) nung Governor C.P. Radhakrishnan-i sign süa lir.

2015 nung Devendra Fadnavis-i Chief Minister inyakdang Maharashtra nung nashi tepsetba, ayokba aser nashishi achiba noktanga liasü.

ASANGMA RIONGSANGER PUTU MENDEN

P.O. Tuli - 798618 Dist. Mokochung : Nagaland

METETDAKTSÜR

Kelingmen aser Asangma yimsuser 23rd September 2024 anogo mensem mena lemtetba. Kelingmen, Asangma, lushi ayongtem nung ango asüba mim mozü aser ango arongba battery mamshitsü ozüng renema akaba maneni akangshia pushiteptsü pangjemba sangdonger.

(I. Kilang Jamir)
Chairman

Asangma Village Council

(I. Imsu Jamir)
Chairman

Kelingmen Village Council

Mokokchung nung Mini Job Fair ayongzük



oka MPCs Private Limited, Expertons Team aser District Employment Exchange ketdangsurtem noksa nung angur.

Dimapur, Rongjui/Sept. 30 (TYO): Mokokchung district nung mapa bushir nem mapa inyaksü atema maongka agütsüsü aser career counselling agütsüsü nükjiding nung District Employment Exchange /Model Career Centre ajanga National Career Service den lungjemer District Employment Office Complex, Mokokchung nung

September 27, 2024 nü Mini Job Fair takok ngua agiogo. Iba sentong nung nübu shimer tongti ya Toka MPCs Private Limited liasü aser parnoki Customer Service Associate, Team Leader, Quality Analyst, aser Trainer densema mapa balala atema nübu shima liasü. Iba recruitment den külemi Expertons team nungi mongin

temi job placement atema career counselling sessions agüja liasü. Iba sentong yagi Mokokchung nung mapa bushirtem yariba nung District Employment Exchange ajanga bendanga agütsür inyakba sayur. Parnoki tarutsü anogotem nunga iba ama sentong ayongzüksü tebilemba lir, ta sangdong ka ajanga ashi.

Shamator district administration-i exposure trip ayongzük



Dimapur, Rongjui/Sept. 30 (TYO): SDO (C), Athrong-i anir Shamator District Administration ajanga Mission Shakti- SANKALP-BBPP-DHEW kübok Adolescents Friendly Health Clinic atema September 28, 2024 nü exposure trip ka ayongzüka

Sangphur Village Health and Wellness Center semdanga liasü. Iba mapang shisalen sayur CHO, Sangphur HWC, Epibeni Lotha-i Menstrual Hygiene, Early marriage, Gender sensitization aser HIV/AIDS amala onüktem nung jembia

liasü. Kasa mapang HWC staff temi girl education indang onük nung jembia liasü. Kasa mapang BBBP kübok Christian Higher School Shamator nungi teinlonglong tetsür nem sanitary pads angati lema agüja liasü.

Wildlife Week 2024 nung nüburtem shilem agitsü ayongzüker

Dimapur, Rongjui/Sept. 30 (TYO): Linük nung Wildlife Week 2024 amungtsü renemtepa mapang Minister, Environment, Forest, and Climate Change, C. L. John-i state nung aliba nüburtem den salem lemsatepa liasü. Küm shia amungba sentong ya October 2-8, 2024 anogotem "Wildlife Conservation Through Coexistence" omen nung ajemdaker amungtsü. Hopta tepiyong iba anogomung amungtsü lia Minister-i sangdong ka nung arem shiruru wazüka ayutsü asoshi aroki shilem agitsü tongtipang lir ta ashi. "Asenok teka amteper Wildlife Week 2024 benjongdang

asenoki asen natural heritage kumzüka aser wazüka ayutsü mulungtetshiti," ta pai ashi. Nüburtemi shilem agitsü atema Department of Environment, Forest, and Climate Change (DEFCC) ajanga sentong balala yanglua lir. Iba mapang awareness campaigns, quizzes, painting aser debate competition, talk shows, "Run for Nature" aser sports meet ka ayongzüksü. Iba den külemi awareness prokshitsü atema osangkaket balala nung arem shiruru wazüka ayuba nung rangloker articles zülutsü. State nung arem shiruru wazüka ayuba tsütsü tejakleni aoba indang lemsatepdang,

yimtsüing 200 jungnüa nung Community Reserves (CRS) amenoka aliba atema Minister C.L. John-i tejak tentetba lemsatepa liasü. Ibai state-i arem shiruru wazüka ayutsü asoshi bendanga agütsür inyakba maparen lir, ta pai ashi. Amur Falcon ozü takok ngua wazüka ayuba ajanga alimai tenüngsang agütsüba indanga pai ashi, Minister John-i kija, school, yimtsüing nung tentet balala aser civil society organisations (CSOs) dang sentong balala nung shilem agitsü ayongzüka liasü. Minister-isa nüburtem dang bendanga agütsüshir libajen wazüka ayutsü asoshi inyaksü ajungshia liasü.

2nd NAP Bn. Alichen Family Welfare-i workshop ayongzük



Dimapur, Rongjui/Sept. 30 (TYO): Unit personnel aser talisa jawan tem kinungtsü asoshi 2nd NAP Bn. Alichen Family Welfare ajanga September 27, 2024 nü Unit Darbar Hall nung Multi Skill and Self-Sustenance workshop ka ayongzüka liasü.

Iba workshop tenzüka sentong tatsüka agidang Family Welfare Committee indang executive member ajanga iba workshop nükjiding rateta ashi. Iba workshop nung counters tenet lapoka shilem agir nem Tailoring and cutting, Hair and

Skin Care, Baking, Manure Making, Floriculture, Culinary aser Bamboo Handicrafts amala training agüja liasü. Iba sentong nung unit school kaketshir tema shilem agia parnoka shisatsü jenti angazüka liasü.

PDADNC ajanga sangdonger

Dimapur, Rongjui/Sept. 30 (TYO): Petroleum Dealers' Association for Dimapur, Niuland and Chümoukedima (PDADNC) pur October 2, 2024 nü Annual Gathering cum Picnic aotsü alinüing iba anogo district asem kübok Retail Outlets (Pumps) kar

nikongdang 3:00 ako tashi shibangtsü, ta PDAD sangdong ka ajanga ashi. Kasa mapang district asem nungi retail outlets tasen indang kibur aser manager ajunga iba sentong nug shilem agitsü jaoker, ta sangdong ajangasa ashi.

Assam Rifles temi awareness lecture sentong ayongzük



Dimapur, Rongjui/Sept. 30 (TYO): Assam Rifles temi Government Senior Secondary School Jalukie nung azünger kaketshir dang armed forces nung adentsü atema awareness lecture sentong ka September 30, 2024 nü ayongzüka liasü. Iba sentong nung kaketshir 72 aden. Lanurtem nem armed forces

nung shimba yimya indang tali tejangjaba nung angatetdaksütsü aser yimtsüing nung aliba lanurtem nem sepai kumba tajangzük angatetdaksütsü asoshi iba sentong ya ayongzüka liasü. Iba sentong nung lanurtemi temulung agüja aden aser parnokia armed forces nung adentsü tejangraba lemsatepa liasü.

Noklak nung Cooking & Baking training agütsüsü

Dimapur, Rongjui/Sept. 30 (TYO): District Administration ajanga District HUB for Empowerment of women (DHED) den lungjemer Noklak nung courses balala ayongzüksü, ta Deputy Commissioner, Noklak ajanga sangdong ka nung ashi. October 3-5, 2024 anogotem Cooking Course agütsüsü aser iba mapang nisung 20 tashi training agitettsü.

Iba sülen October 10-12, 2024 anogotem Baking Course training agütsüsü, kong nisung 15 tashi shilem agitettsü. Iba training nung shilem agitsü janrar temi October 1, 2024 nü tashinung mobile number 9863164705 dangi WhatsApp ajanga tenüing, address, mobile number tem yoktsü akok. Iba training ya angati alitsü, ta sangdong ajangasa ashi.

Longleng nung district level DAKSHATA training temogo

Dimapur, Rongjui/Sept. 30 (TYO): District Hospital Longleng nung Healthcare providers nem asemnü District level DAKSHATA training September 25-27, 2024 anogotem agüja liasü. DPO (RCH/UIP) Dr. Imtjijungshi-iba training tenzüka pela agizükba o jembidang iba training indang nükjiding lemsatep, koba ajanga tanur asoba mapang aser iba sülen tanur tetsü aser kinü tanur anepaluba yimya tajungba kumdaktsür.

Asemnü training agiba mapang 'pre and post-test sessions', practice demonstration of normal delivery, kinü tanur anepaluba yimyatem, labour room managements, prevention, identification and management of pre-eclampsia and eclampsia, new born infections, postpartum haemorrhage (PPH), biomedical waste managements, reporting and recording amala indang sayua liasü. Tanur asoba mapang kinü tanur aser tetsür anepaluyim tajungba kumdaktsüsü, tanur asoba mapang tetsü aser tanur asüba ajemdaktsüsü atema service tajung agütsüsü nükjiding nung iba training ya agütsü.

Iba training nung shisalen sayur ya District Hospital Longleng nungi Dr. Dennis Chingpen (SMO) OBGY aser Lily Phom Staff Nurse liasü. Tanur asoba mapang tetsü aser kinü tanur yariba aser iba sülen tanur tetsü temang aser tekolok nung timtem ajuruba yariba nung tajungba kumdaktsüsü asoshi labour room nung inyakba staff tem temulung uludaktsüsü nükjiding nung iba training ya ayongzüka liasü.

Asemnü training agidang mannequins aser dummies tem amshia liasü. Iba training nung Longleng District kübok Staff Nurses, ANMs aser Health Units indang CHOs tem dena liasü.

Hezbollah lenir Nasrallah tepsetba anema Kashmir nung longkak ait



Hezbollah lenir, Sayyed Hassan Nasrallah tepsetba anema September 30, 2024 nü Kashmir Valley nung Shia Muslim nungertemi longkak aidang tangokba noksa nung angur.

Srinagar, Rongjui/ September 30 (Agencies): Anogo ishika tejaklen Israel sepaitemi Lebanon nung Hezbollah telok nung tongti lenir, Hassan Nasrallah tepsetba anema Hombarnü Srinagar aser iba yimti temekettem nung, talisa Kashmir Valley nung Shia Muslim nütsüng aika aliba tesemtem nung longkak sashia aitogo.

Budgam, Baramulla, Bandipora aser Srinagar yimtittem nung tesem aika nung shishilembaba tesemtem shibanger longkak ait.

Ano PDP Tir aser taoba mapang Jammu & Kashmir

Chief Minister Mehbooba Mufti, National Conference party nungi MP, Syed Rahullah aser Peoples Conference nung lenir Imran Ansari nungertem assembly election atema nüboyim sentongtem thinena liasü.

Sonari nungi National Conference candidate, Hilal Akbar Lone-ia election nüboyim sentong thinener longkak aita liasü.

BJP-ibo, PDP Tir Mufti-i Nasrallah atema mangyimbaji lai kiralongrartem pusemba agi lir, ta sashia aitsüogo.

Taoba mapang Union minister Anurag Thakur-i,

National Conference, PDP aser Congress party temi tang Gaza tensa indang junga meteta dang lir, ajisüaka Bangladesh yimtiba, Dhaka nung Hindu nungertem dak kechi atalokdar, ibajibo memetet, ta ashi.

Budgam jila aser north Kashmir kübok kiyong aika nunga lokti tulu adenshia Israel anema longkak aita liasü. Tetsürtema aikati longkak aitba nungji shilem agia liasü.

Longkak aiterem rongnung nisung kati, "Kechi atalokdar tang tashi ni mangateter. Ni aoksar aser jashir. Ni bilembaji o agi ashitsü makoker," ta ashi.

Haryana aser J&K election nung Congress-i takok angutsü: Jairam Ramesh

New Delhi, September 30 (Agencies): Hombarnü Congress lenir tain, Jairam Ramesh-i, par party-i Haryana aser Jammu & Kashmir na nung takok ngua sorkar tentettsü aser October 8 nü assembly election agiba osang sangdongba mapang nungi tenzüka Centre nung Ato kilonser Narendra Modi atsüngdoktsü atema tetenzüker asütsü, ta metetdaksü.

Interview ka nung jembidang paisa, Haryana aser Jammu & Kashmir nung assembly election mapang telemsa adokdaksütsü atema BJP-i Vitamin-P agütsür, saka taoba Lok Sabha election nung ama nüburtemi parnok sendoktsü, ta ashi.

"Ato kilonser mapang tatembangleni arur, ta June 4, 2024 nü (Lok Sabha election sangdongba anogo) mezüng temaitsü sayuogo aser October 8 ya tanabuba temaitsü asütsü, ta ni bilemer. Tatemsa November ita nung Maharashtra aser Jharkhand nung election agiba sülen tatembangbuba temaitsü sayutsü," ta Ramesh-i ashi.

"Haryana aser J&K election dak sendakba nung, Congress-i Haryana aser J&K naprongla

nung atangji takok angutsü ta ni bilemer. Iba ya Ato kilonser agientsü mapang tetenzüker asütsü," ta Ramesh-i ashi.

Tawa BJP-i, "Pakistan occupied Kashmir (PoK) ya Jammu & Kashmir shilem asütsü" ta jembiba dak sendakba Congress general secretary Ramesh-i, iba ya tang tasen masü aser iba ya BJP indang telemsa adokdaksüba propaganda lir, ta ashi.

"Parnoki telemsa adokdaksütsü merangbaji ajanga ni mesümganger. Iba ya J&K nung dang masü saka state ajak nung inyaker. Parnoki polarisation atema Vitamin P dang meteta lir. Parnok indang Vitamin P anaji — polarisation atema P aser power atema P lir," ta Ramesh-i ashi.

Ajisüaka telemsa adokdaksüba ajanga 2024 küm kecha mesütet aser June 4 nü India nungertemi telemsa adokdaksüba anema vote agütsü aser kasaji Jammu & Kashmir aser Haryana na nunga ataloktsü, ta paisa shisem.

Jammu & Kashmir nung election shilem tatembangbuba October 1 nü agitsü aser Haryana Assembly election October 5 nü agitsü.

Nitish Kumar, Lalu aser BJP-i Bihar terenlok sendoker: Prashant Kishor

Patna, September 30 (Agencies): Election atema asalentong yanglur mongin, Prashant Kishor-i Bihar nung kanga tongtibang yimtenren lenirtem aitsüba den külemi Bihar nung rongsenkettzüng jenjang merenlokba jani parnok tai ajanga lir, ta metetdaksü.

Kishor-i pa indang 'Jan Suraaj' movement ya October 2 nü yimtenren party ka akümba sangdongtsü.

Kishor-i, Bihar Chief Minister Nitish Kumar, Rashtriya Janata Dal (RJD) tongti lenir Lalu Prasad Yadav aser BJP-i Bihar tejakleni

manitet, ta aitsü.

Mapang ka nungbo Kishor-i Nitish Kumar nungtugu akümtsü yaria liasü saka tangbo pai Kumar ya 'lenmang aibelenba lenir ka' ta shia aitsür.

Prashant Kishor-isa Lalu Prasad Yadav aija, pai nütsüng ajema aliba Muslim nungertem dang nungi maongka agir aser votebank ama amshir, ta aitsü.

"Lalu-i parnokji milen (RJD temaitsü) nung kerosene totzü ama rongdoker," ta Kishor-i ashi. BJP aija Kishor-i, 2019 küm aser 2024 küm Lok Sabha elections nung takok anguyonga BJP-i Bihar terenlokbo

sendokogo, ta aitsü.

Kishor-isa, Bihar nung BJP lenirtemji nüburtem den sendaktepa mali aser state nung party tongti lenirtem aika nüburtemi memetet, ta ashi.

Kishor-i, Bihar nung yimtenrenji kanga tashi tulu aliba kibong ishikati dang amokbanga lir, ta aitsü.

Paisa, Lalu Yadav aser Nitish Kumar nati Bihar state merenlokdaksüba atema tenati peisasa peii aibelenba lir ta bilemer aser Congress o BJP na ya election nung takok nguaka state sendoker aibelenertem lir, ta aitsü.



Kolkata, September 30, 2024: Actor aser BJP lenir, Mithun Chakraborty nem Dadasaheb Phalke Award agütsütsü, ta sangdongba sülen osangbenertem den pai jembidang tangokba noksa nung angur.

US Mission to India-i aika nem visa maongka agütsür

New Delhi, September 30 (Agencies): U.S. Mission to India-i India nungertem tourist, mapa inyakerterem aser kaketshirtem densema ainlen senzürtem 250,000 atema visa maongka lapoktsüogo, ta ketdangsertem osang ka ajanga metetdaksü.

Tang maongka tasen agütsüba ya ajanga India nungertem visa meshir meyirjang aikati mapang shidak nung teyari angutsü; koba ajanga US aser India na tsüngda nüburtem tesendaktep ano tajungba akümtsü, ta parnok metetdaksü.

"U.S. Mission to India-i taküm agi küm anabuba nonimmigrant visa applications million 1 agizükogo. Taküm mei mongpu nung student visa mapang onoki maneni visa aika agizükogo aser tang mezüngpur student applicants-i India nung onok indang consular section pongu rongnung ka nungbosa

appointment nguteta liasü. Tang onoki kibongtem longjemdaksütsü, shishilembartem sendakteptsütsü aser tourism ajungkettsütsü atema rangloker inyaker," ta US Mission to India-i metetdaksü.

"2024 küm tenzükbaba sülen tang tashi nung India nungertem million 1.2 dak temai United States semdangogo, aser ibaji 2023 küm den medemdangra shilem 35 agi teimba lir. United States semdangtsü atema India nungertem million 6 ket nung nonimmigrant visa lir aser anogo shia Mission-i meyirjang aika agütsür," ta parnokisa metetdaksü.

Tawa U.S. Ambassador to India, Eric Garcetti-i, "Visa inyakyim tajungba akümtsü aser tekaraba inyaksü asoshi Ato kilonser Narendra Modi aser Tir Joe Biden nati nükjidong ayu aser onoki yamaji inyaktetdar, ta ni nüma tanga ashir," ta metetdaksü liasü.



October 1, 2024 nü Jammu & Kashmir nung election shilem tasembuba agitsü lia Hombarnü Baramulla district nung polling ketdangsertem polling station-i aodang tangokba noksa nung angur.



TIR YIMYIM YIMOBILEM (EDITORIAL)

DIMAPUR SANGTENNÜ, OCTOBER (MONGPUTENI) 01, 2024

Chiyongtsü atema masü !

Asenok nisungtem alima nung taküm aliba ya chiyongtsü atema alir masü, saka taküm alitsü atema chiyonger, anungji koba chiyongtsübo achitsüla aser kobabo machitsüla ta asüba onük aser mapatem ya tongtibang masü saka alima nung ya asenok taküm ya koma alir ta asübajiang tongtibangba lir. Kasaji, India nung alirtem rongnung nashi shi achitsüla-machitsüla ta asüba o agi yimten o kuma jembitsü menügdaker. Aji oda, nashi shi achi nung dang mesüra machi nung dang Tsüngrem pelatsü mesüra mepelatsü ta asüba tamangba yimsütem yabo Tsüngrem dak amangba yimsü masü saka nisungi nisung dak amangdaksütsü tentetba aser jembiba o ka dang asütsü, kechiyong shi achiba mesüra machiba agi kotaki aotsü masü saka Tsüngremi mulungba ama ali nung dang kotaki aotsü. Atangji, Khristan-tem asoshibo tejen Lai nung ashiba beshidi asünungbo nashi shi dang achitsüla saka ak shibo machitsüla saka asenok asoshi ak shiji Tsüngremi memelungba chiyongtsü ka masü, Tsüngremi moatsüba chiyongtsü, anungji tenüngsang agüja sarasademer achir. Aji oda, Hindu nung asoshi nashi ya tsüngrem, anungji Hindu nungertemibo nashi shi machiba dang masü saka nashi külemer. Ajisüaka, India nung nashi shi ayokba mapa tulubo Hindu nungertemi dang inyaker ta tangang tali jangjar. Item tatalokbatem ya kodang bilemdangdir asenok rongnung chiyongtsü atema bangsentepba ya tanga tejembitsü onük mapitet aser teinyaksü mapa mangu kidangmongertem pi nüngsen jembia mongteper amai lir. Aji oda, linük ajaklen nashi maleptsüla aser nashi shi machitsüla ta sayutsüngia jajatsü atema tayimtsü balaka hire ser jajaba nung sen endoktsü agibo, iba senji mozü kidang amshitsü tenla agütsü nung koda tajungba süla. Kasaji, tangar tamangba yimsü kati asen lima nung nashi maleptsüla aser nashi shi machitsüla ta sayutsüngitsü arunüba mechi asenok rongnung kati ka aitsütepa kazütsüa kecha nungdak madoker. Ak shi machitsüla, nashi shi machitsüla, azü shi machitsüla, angö tip maketbabo machitsüla ta asüba amala tenokdangbatem ya kar tamangba yimsü nung alitsüa akok aser karbo sobaliba nung alitsüa akok, itemji peisasa angateta beshitsü jungger. Aji oda, asen limai tanga tamangba yimsü sayur ka arur asenok dak nashi shi machitsü sayutsüngiaka asenoki mangara pa arubaji amajok, anungji asen limai nashi maleptsüba osang bener sayutsüngir ka aruya lia nokdangbaji asenok tamangertem asoshi tanela tongpang tuluka akok amai mebilemtsüla. Asenok Khristan-tem tongpang yabo shi aser azü den raraba tongpang ka masü saka tanela tongpang lir, anungji asenok daka aser parnok daka iba tanela jagi dang Tsüngremi mulungba inyadaksütsüla. Shi aser azü indang dang kodang bilemdangdir, yimsü ajak dang nungi Khristan yimsü dak amangtsüba yasa temelaba aser tesadamba lir, kechiyong alima nung Khristan-tem machitsübo kecha maka, iba jagi balaka tangari asenok dang ya achitsüla saka yabo machitsüla ta meshidaksüner. Ajisüaka, kodang asenoki tanela khuret angateta Khristan yimsü osang tajung ya tangar den lemsatepnüdir, asenoki nashi shi machir kintem den nashi shi machi arema kulisüba mapa inyaktettsü. Kasaji asenoki akshi machiba kintem den akshi machi arema Yisu temeim kuli sütettsü. Aji oda, kodang nashi shi mesüra ak shi machir nisung ka temulung meyipa Khristan kümdir, joko pa Khristan kümerji nashi shi aser ak shi achitsüla ta masü saka pa Khristan makümdang chiyongba yimya kenyongi memelenshii Yisu dak amangtettsü. Iba osang tajungji nashi shi aser ak shi machirtem den lemsateptsübaji asenok tanela khuret asütsüla. Ajisüaka, kodang asenoki kechisüdirsüaka onokbo nashi shibosa achitsü mesüra akshibosa achitsü ta tangar tsüngdang tekong meranga nokdaker, ajibo tanela anir arur masü saka temeindoker asütsü. Asenok Aor medical doctor kabo kinungtsü Khristan kümdaksür la den linüba agi shi machir 'vegetarian' akümba nisunga lir. Iba amaji chiyongtsü masü saka tangatetba shisatsü bushitsübajiang asenok asoshi tongtibangba akümtsüla.

OLEMSABANG

ASENOK TENZÜKBA ASER ADENBA AROGO YA TEMESHI LIR

~ L. Kika Pongener.

Asenok tenzükba aser asenok adenba arogo ya Temeshi lir. Anungji kanga asüngteta aser meshiteta tenzüktsüla. Mosa Horeb tenem nung san nuka lia, Tsüngremi sungsempok ka nung mi jangrua, iba sungsempok nungi ola adoka Mosa den jembiba...Tsüngremi Mosa dang ashi..."Mosa yangi anasa taru, ne tsüng nungi tsüngsem semzükang, kechiaser koba ali nung na nokdaker aji Temeshi lir" (Anitet-3:5). Israel-purtem Ijip lima nung alar tia nung aliba aniteter, Kannan limai anir aotsü asoshi Tsüngremi Mosa nem iba mapaji nungloktsütsü atema Mosa den jembinur....Saka iba mapang nungji, Mosa memerukba tsüngsem sema liasü....Anungji Tsüngremi tamasa ne tsüng nungi tsüngsem semzükang ta ashi....Kechiyong Mosa noktakba ali-ji 'Temeshi liasü.

Tanü asen putu nunga temenen lar kümer, temenen sungra talenba küpok alirtem, sama-a aliba santem bushia anir arutsü, mesutsü aser anuktsü atema, Tsüngremi balaka jatetba tenzükera/tenzükla ajak dang....Mosa dang ashiba ama....Nenok tenzükba aser nenok adenba arogoji 'Temeshi' lir....Nenok nem nungloktsüba mapa aser wadangji 'Temeshi' lir. Anungji nenok iba arogo nungji tenzüktsü atema....Mesura nenok nem inyaksü nungloktsüba mapa aser wadang nungji inyaksü atema....Tamasa nenok dak aliba memeshiba, memerukba, masüngtetba, mazüokba, ochimashiba, sen meimba, item temenen kechisa lir...item ajakji semzüka endokang ta ashir. Ano Tsüngrem o-i ashir...."Kibuba tenemi shiba atutsü ? Aser pa Temeshidak shiba nokdaksü ? Shiba teka nung arr mali aser temulong temerük lir; Shiba dak tiyazü mulongsentsü mali; Aser tekülak agi azüngashi masür; Pai Kibuba nungi temoatsü angutsü" (T.Ken-24:3-5). Atangji, arogo-ji Kibubar tenem mesuka lir....aser arogoji Temeshi tesem ka lir....Anungji iba arogo nungji nokdaksü aser tenzüktsü atema....Teka nung arr malitsüla.... Teka temerük asütsüla....Tiyazü mulongsentsü malitsüla aser tekülak agi azüngashi masütsüla.

Arogo ya Yisu-i pa zü agi alizük....Anungji shirnoki iba arogo nung tenzükera kangasa kümdanga tenzüktsüla. Tsüngrem o-i ashir..."Kibubai pei zü agi alizükba arogo mesutsü asoshi, koba nung Tanela Temeshi-i nenok sannukertem asütsü shimtet, iba san telok aser nenok sasa asoshi kümdangang" (T.Mapa-20:28). Aji oda, kümdangang ta ashiba o-ji kanga tepungpabo masü, saka kangasa taret lir, kechiyong mekümdangi tenzükra, ashiko, temerenshi tulu lir ta angateter. Anungji iba arogo nungji tenzüktsü atema tamasa asenok dak yimya supaba temenen kechisa lir, achi-ajem mazüokba, memeruk, chidiyungdi, ochimashi, masüngtet, rongsen penbuba, item temenen-tem ajak semzüka endoktsüla. Mosa-i Tsüngremi ashiba ama pa tetsüng nungi tsüngsem semzüka endoker külenang....Tsüngremi Mosa den jembiba aser pa nem nungloktsütsüba mapa-jia nungloktsüba angur. Atangji, asenoki suboa aliba subotsü tamajungtem semzüka meintok tashi, Tsüngremi pa mapaji asenok nem menungloktsütsü. Aji oda, Tsüngremi pa mapa/wadang menungloktsü ser, tenzükba mapa nung teka sotaka tenzükba...Küm aika tenzükyaongjia amajok nung mapang endoka ani-belemseta tenzükba dang asütsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Khristan melungtet telok balalai 'Helene' yipru agi kongshirtem yarir



September 27, 2024 nü Helene yipru ajanga Florida kübok Horseshoe Beach nung ki aika raksaja aliba noksa nung angur.

September 30, 2024: Sepstember 27, 2024 nü 'Helene' ta ajaba yipru mopung tesashi agi Florida kübok Big Bend region kongshiba sülen Georgia, Carolinas, Virginia aser Tennessee kongshia liasü aser iba lendong ajanga nisung 60 dak tema asüba den külemi nisung million aika light power makai timtemdar.

Iba ama tensa ka nung Samaritan's Purse aser The Salvation Army ama Khristan melungtet teloktemi southeastern United States tesem ajaklen lendong agi kongshirtem yari tenzükogo.

Iba yipru yagi tzüküm mezüng atongdangbo 'Category 4 storm' dang liasü. Iba mapang nungji tzünglu kanga aruba den külemi yipru mopung sashia aon aser tesem aika nung tzümetsüng agi kongshi; talisa iba lendong ajanga Florida, Georgia, North Carolina aser Tennessee kongshi.

Helene yipru lendong nung US kübok state pongu nung nisung 63 asü, ta National Hurricane Center-i metetdaksü.

State ketdangsertemi ashiba agi, South Carolina nung nisung 20 asü, Georgia nung nisung 17 asü aser Alamo nung nisung ana asü. Florida nunga nisung 11 asü aser Virginia kübok Craig County nunga nisung ka asü.

Billy Graham Evangelistic Association nung Tir aser Samaritan's Purse nung CEO, Franklin Graham-i social media ajanga, "Iba yipru ya kanga tesashi. Iba yipru agi kongshitsüsa alirtem ajak kümzüksü atema sarasademjang," ta jelia metetdakja liasü.

Franklin Graham-i aniba organization anati iba yipru agi kongshiba nüburtem nem chiyungtsü den külemi tanela tsütsülen nungia yaridar.

Billy Graham Rapid Response Team-i chaplain tem aika yipru agi tamajungtiba tesemtemi yokogo; item rongnung Florida kübok Tampa aser Perry, Georgia kübok

Valdosta aser North Carolina kübok High Country densema lir, ta BGEA-i metetdaksü.

Item chaplain temi lendong agi kongshibapurtem jenokdakja aliba shelters nung tanela chiyungtsü agütsüba den külemi hospital nung amongertem yaridar.

Billy Graham Rapid Response Team International Director, Josh Holland-i, state tesem balala nung teraksatsübatemji amangtsüsa masü, ta ashi.

Paisa, "Aiben onoki yipru mopung lendong atema renema dang alir aser Hurricane Helene tzüküm atongba mapang nunga onoki repranga liasü. Iba yipru ajanga teraksatsüabajji ajanga aika kanga süngmanger. State aika nung teraksatsübatemji mamangtetsüka liasü," ta ashi.

Ano külen Samaritan's Purse telokia Southeast America kübok kanga tongtibang tesem pongu nung yipru agi kongshirtem yaridar. Samaritan's Purse-i Florida kübok Perry nung tiyongtsü süa amenoker teyari agütsüba maparen inyaker. Iba dak alia parnoki Valdosta, Georgia aser High Country nunga base amenoker nungdakbapurtem yaridar.

"Anogo shia amai Samaritan's Purse-i alima tesem balala nung yipru aser lendong balala agi kongshirtem yarir, ajisüaka tang yabo yipru agi onok aliba tesem kongshi," ta nungtugu sayutsüngir, asür Billy Graham'er jabaso, Franklin Graham-i metetdaksü.

Ano Khristan melungtet telok Convoy of Hope-ia Florida kübok Perry nung yipru agi kongshibapurtem yaridar. Parnoki chiyungtsü den tzü tajemtsü aser hygiene kits lema agütsür.

Perry nung aliba First Assembly of God Church nung pastor, Dave-i Convoy of Hope telok dang, "Iba lendong ya menoknok ama liasü. Nenok

yagi aruba atema onok kanga pelar. Ni ozü medemertem dang 'teyari aruogo' ta ashi. Nenoki mapa tajung inyaker," ta lemsatop.

Ano Khristan melungtet telok Salvation Army-ia mobile feeding unit 10 amshia yipru agi kongshirtem nem anogo shia nisung 1,500 shi nem chiyungtsü agütsüdar.

Salvation Army nung national commander, Kenneth Hodder-i, "Lendong mapang nung onoki timtemertem yaritsü atema longjemer," ta metetdaksü.

Ketdangsertem osang ajanga ashiba agi, Helene yipru ajanga state balala nung dollar sen billion 15 nungi billion 26 shi jenjang kiojen raksaogo aser tang tashi nisung million 3 bo lgiht power makai timtemdar.

ANO GO ABEN TSÜNGREM DEN

Ni kodang tambur südir

T. Ken 71:1-11

Tambur, tantsür asoshi iba ken ya kanga tanganütsü ken ka lir. Iba yagi tambur akümdang Tsüngremer temoatsü nung balaka rangloker. "Tambur tia nung nai ni teindok; tashi makai akümdang nai ni senzüka teyutsü" (t.9).

Asenok tambur akümdang Tsüngremi asenok asoshi kechi inyaker? Asenok tain kümer tebilemtsü agi atongdang Pai asenok yarir. Tashi mait tatishitsü. Tekong 9 nung Dawidi kechi indang jembir: "Tashi makai akümdang nai ni senzüka teyutsü." Tema takümüji tashi meiti akümer, saka telunglen anogo shia tasen kümshitsü akok. Tsüngremi ne nungdakba tanelaren tashi agütsütsü.


Asenok tambur aküm tanga tebilemtsü ka asenok ajurubaji ratamata. "Ne dak, O Kibuba, ni kü tamang ayur: Ni kodanga taakdaksü" (t.1). Iba lima nung aika melenshia aodang tambur kuma aodang asenoki ashitsü, "Kechi ataloker ni memeteter." Saka Tsüngremi ashir, "Reprangang, iba indang shisa tebulu. Kü dak amangang, aser ni na kodanga ratamata meyutsütsü."

Tasembuba tebilemtsüji tesüba menungraba. Aiben asenoki jembir, "Tejenba anogotem tajung to meyipang." Dawidi ashi, "Kechiaser na kü teyimla lir, O Kibuba Tsüngrem" (t.5). Pa tarutsü mapang lia liasü. Tarutsü sota lir, asenoki memetet, saka Tsüngreni asenok tarutsü lia sotta lir ta asenoki metet.

Tatamsa asenoki nemnemshishi tebilemtsü ajurutsü akok. Tambur akümdang melamela nemnemshishi asür. Saka Dawidi ashi, "Anogo tepiyong ne nüngsang agi, aser na tushiba agi kü bang sünga alitsü" (t.8). Kodang asenoki Kibuba den jajadir, Pai tashi mait aser terata ajak anebalur. Tarutsü tetsüba ajak pai repranger. Nemnemshinem melen Pa tenüngsang asangba agütsür, anungji asenok tesünep nung tambur, tantsür akümer.

Taküm jenjang shia tejangja maongka aser tebilemtsütem lir. Aser item ajak ajanga Tsüngrem ne den lir. Na tambur tebilemtsü ajurur asü? Na tashi mait, terata, aser tesüba menungra a nemnemshishia alir asü? Ne tetsübutem Tsüngrem dangi bener arung. Pai pa nüburtem yariba nung pelar.

Ezra Sargunam asüba atema Evangelical Fellowship of India-i mangyimer



Ezra Sargunam

September 30, 2024: Evangelical Church of India (ECI) nung tongti putir, Ezra Sargunam asüba atema Evangelical Fellowship of India (EFI)-i mangyimdar.

Pa arrshi küm 86 nung asü. ECI nung lenirtem aser züngsemtemi temeim agi pa dang Oba ta jaa liasü. September 22, 2024 nü pa alima nungi pila. Pa ya tamangtir ka, mangdang aliba lenir ka aser India nung Khristantem atema kanga meranga inyakba lenir ka liasü.

Sargunam ya India nung Khristan yimsü lenirtem rongnung mezüngpur liasü. Pai Khrista osangtajung proktsü

atema jangra, Arogo tasen loktiliba nung ajak nem kasa temeden agütsütsü atema ola adokba lenir ka liasü.

Pa taküm piyong pai Arogo nung ajak züngoktsü aser ajak nem tashi agütsütsü atema inyak. Pai Scheduled Castes nüburtem, nütsüng ajema alirtem aser tribal nisungtem ama jenjang ajemzuka aliba nüburtem taküm jenjang ajungkettsütsü atema kanga meranga inyak.

Sargunam-i Arogo Tenla ki adener aika ayimjema inyak. Yimsü lenirtem aser yimtenren lenirtem tsüngda pa ya apulatsür ka liasü aser India nung Khristantem temeden atema pai linük nung tongti lenirtem den jembia aruogo.

Pai asür, M. Karunanidhi den-a tesendaktep tajung ayu, aser ibaji India nung Khristantem jenjang tajungba akümtsü atema pai yimtenren lenirtem den tesendaktep ayuba kuli sayur.

India nung Arogo mission asalentong yangluba tsütsü Sargunam-i kanga tongtibang

shilem agia liasü. 1986 küm tentetsütsü atema inyaker Mission Mandate ya mission studies atema kanga tongtibang document ka aküm, aser ibaji ajanga Khristan tenzükba wadang inyaksü asoshi lanur aika ajungmesoa pei taküm bendanga agüja liasü.

"Evangelical Fellowship of India-i Ezra Sargunam-i India nung evangelical movement atema inyakba mapa tajungtem bilemteter. Pai kilir ka ama lenisüba mapa tajung inyakogo aser Khrista osangtajung prokba wadang junga inyakogo," ta EFI-i metetdaksü.

EFI General Secretary, Rev. Vijayesh Lal-i, "Bishop Ezra Sargunam alima nungi pilaba ajanga India nung Khristan wadang nung tapok patsür. Pai kanga tasü itta Khrista osangtajung prok, iba denji külemi loktiliba nung ochi temeden atema inyakba ajanga asenok ajak nem tatishitsü tajung yutsüogo. Pa taküm aser pai toktsüba senmang atema onok pelar; ibaji ajanga tarutsü putu aika tamangertem ajungmesotsü," ta metetdaksü.

AO OSHI ANGAZÜKDAK:
TANÜ ANGAZÜKTSÜBA OJANG



Tangola

(n) telong nungi adokba mopong, tango (vapour, breath)

* Ali ongken nungi tangola tatsük aser tamajung adoker.

Tangra

(n) jangjaa anguba (clearly visible)

* Anepdang anü adoker tangra mapang mapa tenzük.

OLONG PAITEP # 6940

1			2			3			4
			5		6		7		
8									
			9						
	10								
								11	12
			13				14		
15									
						16			

TIPIEN

- 1. Anenzükdak ki - (5)
- 3. Asür mangyimba - (5)
- 5. Temlung nung shisadang - (5)
- 8. T___lu - (3)
- 10. Takdang temalen - (9)
- 11. Tesa ___a - (3)
- 13. Ajungbena temlungjang tongtonglatsü atu - (5)
- 15. Tejen lai nung tesayur - (5)
- 16. Tsüngsak-mopung - (5)

LANGTSÜNGLEN

- 1. Reprangdaksü - (4)
- 2. ___ ur - (3)
- 4. Kiojen yangludak - (6)
- 6. _____ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüng tajemtdak - (6)
- 12. ___ adenshi - (4)
- 14. Tsünüsenbongtsü adokdak - (3)

OLONG PAITEP # 6939 TELANGZÜBA

TIPIEN :

- 1. Kasa, 6. Rangben, 7. Mait,
- 9. Poktet, 11. Ati, 13. Atasa,
- 16. Rür, 17. Rajang, 20. Lanu,
- 24. Nüngjem, 25. Süra.

LANGTSÜNGLEN :

- 1. Khu, 2. Sükak, 3. Onük, 4. Oba,
- 5. Anü, 6. Ratet, 7. Mozü, 8. Ita,
- 10. Tar, 12. Tinu, 14. Salem, 15. Aja,
- 18. Anünü, 19. Taju, 21. Ano,
- 22. Onü, 23. Kua.

NAI-A YA METETTER MA



New Zealand nung nisung 6,531 adenshir sobaliba tsüngsang 'Haka' aiba ajanga alima otsü tasen ka yangluogo. Auckland nung aliba Eden Park nung parnokki Haka dance nung shilem agi ta Guinness World Records-i ashi.

Nisung 6,531-i 'Ka Mate' haka nung shilem agi ta GWR adjudicator-i kuli agütsü.

Union Finance Minister Sitharaman-i Arunachal semdang



Itanagar, September 30, 2024 (Agencies): Union Minister of Finance and Corporate Affairs Nirmala Sitharaman-i anogo ananü atema Arunachal Pradesh semdangi arua lir.

Arunachal Pradesh nung infrastructure aser connectivity

projects meyipa reprangshitsü atema Sitharaman-i semdang. Tanü la Donyi Polo Airport tonga aru aser idangji Deputy Chief Minister Chowna Mein aser Health Minister Biyuram Wahge nati la pelaa agizük.

Iba mapang Sitharaman-i ketdangsürtem aser sendaktepa

alirtem den ajuruteptsü aser maparen balala inyakba osang lemsasteptsü.

October 1 nü Union Minister Sitharaman-i DK Convention Hall nung Credit Outreach Program nung adentsü aser Namsai nung SBI Regional Business Office lapoktsütsü.

Indra Sena Reddy Nallu-i Mizoram Governor inyaker

Aizawl, September 30, 2024 (Agencies): Indra Sena Reddy Nallu-i September 30 nü Mizoram Governor inyaksü atema tezüngzüktep agiogo.

Nallu ya Tripura Governor lir aser pai Mizoram Governor repsema inyaksü atema Aizawl nung Durbar Hall, Raj Bhavan nung tezüngzüktep agiogo.

Mizoram Governor Dr Hari Babu Kambhampati "during the absence on leave" mapang Nallu-i Governor inyaka atatsü. Gauhati High Court Judge

Justice Nelson Sailo-i Indra Sena Reddy Nallu nem tezüngzüktep agidaksü.

Sentong nung Chief Secretary Dr Renu Sharma-i India President ajanga warrant agütsüba zünga metetdaksü.

Iba sentong nung Chief Minister Lalduhoma, Speaker Lalbiakzama, Home Minister K. Sapdanga, Cabinet Ministers, Minister of states, Lok Sabha MP, Chief Secretary, DGP aser tanga ketdangsürtem aden.

Indra Sena Reddy Nallu ya March 31, 1949 nü Telangana kübok Nalgonda District nung aso. Pa Renuka Nallu den kibong aküm aser tena jabaso asem lir.

Indra Sena Reddy Nallu ya 1983, 1985 aser 1999 nung kümsük asemen tashi Andhra Pradesh melemsadang MLA inyaka liasi.

2003 nung pai BJP state president inyak aser iba sülen BJP national general secretary inyakogo.

Manipur CM-i DGP dang lanur ana kümzüksü tetuyuba agütsü

Imphal, September 30, 2024 (Agencies): September 27, 2024 nü Kangpokpi district nung telungpurtemi pur aoba lanur ana kümzüksü atema DGP Manipur nem tetuyuba agütsüogo ta Chief Minister N Biren Singh-i ashi.

Sorkari akokba tashi lanurtem kümzüksü atema mapa inyakdar ta pai ashi.

"Iba tatalokba atema sasar. Lanur asem rongnung kabo

chiok saka telungpurtemi ana pua lir. Centre aser state sorkartemi tena chiochtsü atema osang agitepdar. Onoki olemtepdar" ta CM Biren-i ashi.

DGP Rajiv Singh-i nisungpurtem den jembiogo aser telangzüba tajung ka angutsü ta pai ashi.

Nisungpurtemi takhangba kar agütsüogo saka sorkari tatemzükba kecha melii lanur

ana chiokdaksütsü meranger ta Biren Singh-isa ashi.

Manipur kübok Thoubal district nung alir lanur asem SSC GD recruitment test atema New Keithelmanbi area-i ao.

Ajisüaka parnok lenmang sama aser Kangpokpi atong. Idakji telungpurtemi parnok pur ao. Kasa anogo nung Indian Army-i lanur asem rongnung N. Johnson Singh kümzük.

**GOVERNMENT OF NAGALAND
DIRECTORATE OF TECHNICAL EDUCATION
NAGALAND: KOHIMA**

NO.DTE/ESTT-2/NEET/01/2021-22/

Dt. Kohima, the 30th Sept 2024

NOTIFICATION

Apropos to the letter received from North Eastern Institute of Ayurveda and Homeopathy (NEIAH) letter No.1-82/2016-17/NEIAH/Admission/UG/PT-VI/515 dated 25th Sept 2024, interested candidates who have qualified for NEET-UG 2024 are invited for filling up the following seats.

Course	Bachelor of Ayurvedic Medicine & Surgery (BAMS)	Bachelor of Homoeopathic Medicine & Surgery (BHMS)
Total Seats Available	63 seats	63 seats
All India Quota	31 seats	31 seats
North East states Quota (except Assam)	Remaining seats	Remaining seats

Course Bachelor of Ayurvedic Medicine & Surgery (BAMS) Bachelor of Homoeopathic Medicine & Surgery (BHMS)
Total Seats Available 63 seats 63 seats
All India Quota 31 seats 31 seats
North East states Quota (except Assam) Remaining seats Remaining seats

Note:

- 1) Prescribed application format and all other information can be downloaded from the institute website www.neiah.nic.in
- 2) Filled-up application form along with necessary enclosures are to be sent by speed post/by hand to the Office of Director, NEIAH, Shillong
- 3) For North East states, state wise merit of the applicant would be drawn on the basis of NEET 2024 and admission will be granted as per the quota of the respective states and reservation policy.

(Er. VIPULHOU LHOUNGU)
Director.

Imran Khan anema ano ken o tasen benokogo



Islamabad, Rongjui/Sept. 30 (Agencies): Taoba ato kilonser Imran Khan-i ayongzükba ama par party puri Honibarnü Rawalpindi indang Liaquat Bagh area nung longkak aitba sülen Punjab police-i pa anema ken o tasen asem benoka liasü.

Pakistan Tehreek-e-Insaf party tentetsang den Khyber Pakhtunkhwa Chief Minister Ali Amin Gandapur aser party chairman Barrister Gohar Khan nungertem anema Anti-Terrorism Act kübok Deobarnü ken o benokogo, ta osang ajanga ashi.

Rawalpindi nung aliba New Town aser Civil Lines police

stations ajanga ken o benokba nung tepsettsü merangba, Section 144 nung aibelenba aser danga kiralongraba dak sendakba aibelen dena lir.

Ken o benokba nung ashiba agi, arishi küm 71 tain lenir-i Adiala Jail nungi pa bhukumer dang national institutions anema longkak aittsü ajungmeso aser totuyuba agütsü.

Khan aser pa bhukumer temi national institution aitsü, ki o jen raksatsü aser long agi aonba dena mepetmesü adokdaksü, ta Punjab sorkari tai tonglokja lir.

Deobarnü Khan bhukumer

temi longkak aitba mapang police den raratep. Khan-i ayongzükba ama PTI bhukumer noklang aika otsüsütsü Liaquat Bagh park nung adenshi, saka police temi barricades mesoa tongtipang lenmang ajunga nokdanga liasü.

PTI ajanga video lemsatepba nung longkak aiter temi police dak long aser longro agi aonba aser longkak aiter temi police tem arishiba nguogo.

Khan-i yimjung nung longkak aittsü ayongzük saka provincial government-i lokti adenshiba nokdang aser yimti telungi aitba tongtipang lenmang ajunga nokdanga liasü.

Police den raratepba sülen takoksa majurutsü mechi party-i longkak aitba anena liasü. Army indang General Headquarters ya Rawalpindi nung lir aser longkak aitba ya GHQ nungi kilometre ishika dang pilar liasü.

Election Commission of Pakistan-i benokba Toshakhana ochimashi ken o nung Khan ya taoba küm August 5 nü mezüing apu. Iba sülen pa ken o balala nung aija tepuokdak yua lir.

US-i Taiwan nem sen \$567 million alang military teyari agütsütsü

Washington, Rongjui/September 30 (Agencies): United States tir Joe Biden-i Taiwan nem USD million 567 alang military teyari agütsütsü atema agizükogo, ta White House sangdong ka ajanga metetdaksü.

Deobarnü sangdong ka ajanga White House-i ashiba agi, Biden-i secretary of state dang Department of Defense indang defense articles aser services aser military education aser training dak sendakba nung Taiwan nem teyari agütsütsü atema USD million 567 asadangsü tetuyuba agütsüogo.

US aser Taiwan na formal diplomatic tesendaktep mali, saka US ya Taipei nongita yarir aser prangbong injang aser hadir balala agütsüba linük rongnung tongtiba lir. China-i Washington dang Taipei dangi

prangbong injang aser hadir balala mayoktsü atema takhangba agüja arudar.

China-i iba asetkong nongshiba mapang ka nung Apri ita US-i Taiwan nem USD billion aika alang military teyari agütsütsü atema agizüka liasü. Beijing-i parnok telung ken o nung jushiba atema Washington aija arudar.

Kasa mapang nung Taipei-i, US-i upgraded F-14 fighter jets densema tanga hadirtem menomeyanga magütsüba atema ashishia arudar.

China-i Taiwan ya parnok meyong ta ashir aser nungdang dang süra tashiyim agi amokbangtsü ta shia arudar.

Ajisüaka Taiwan-i China-i par asetkong ya parnok meyong ta ashiba magizüker aser iba asetkong nung aliba nüburtemi parnok tarutsü shimtsüla ta shia


arudar.

China aser Taiwan na iba ken o dak sendakba nung mapang talangka atsütepa arudar aser iba den külemi US-i Taiwan nem teyari balala agütsüba ajanga China mepelar aser iba mangatettep ya tuluba küma aotsü akok ta tsüba bilemer.

Kasa mapang nung ano China-i South China sea ya timba ka parnok meyong ta akhangba ajanga linük aika den tzüym nung mangatettep adoker lir. Iba ya International temzüng ozüing alema inyaksangshi ka lir, saka Chini-i tashi mangai parnok sünütsü süa arudar.

Tawa parnok SCS nung Philippines den mapangshia mangatettep adoka arudar aser coast guard tem mapangshia raratepba osang temai adokdar.

Israel-i Lebanon nung Hamas lenir ka tepsetogo



Beirut, Rongjui/September 30 (Agencies): Palestine nung telok Hamas-i Hombarnü sangdong ka ajanga ashiba agi, Israel-i southern Lebanon amakba mapang parnok lenir tejen ka tepsetogo.

Hamas nung lenir ya Fateh Sherif Abu el-Amin ta jangjaogo, shiba pa kinungtsü den jala ka aser jabaso ka den külemi tepseta liasü. Par kibong ya Hombarnü Tyre yimti kübok Palestine nung

refugee camp ka nung par kidang tepseta liasü.

Anüing ajanga iba tesem amakba mapang ano telungpur asem tashi tepseta liasü.

Hamas den külemi Israel den rara aliba Popular Front for the Liberation of Palestine (PFLP) teloki ashiba agi, Beirut kübok Kola district nung Israel nungeri anüing ajanga amakba mapang ki ka dak kongshiba sülen parnok züngsem asem taküm samaogo.

Iba tesem amakba indang Israel indang military-i kecha telangzüba magütsü, saka north Israel kümzüka toktsütsü aser nüburtem pei kidangi meyipa yoktsü atema takokba tashi

SANGOKTSÜR

Mr. Moatoshi Tzüdiri kija aser lokti tentet kwika nungi sen aputepa lir iba dak sentakba nung Mangmetong Tzüdir Kidong aser Kidang Kimang ajunga den shingai oka kecha mayongtsü kechiaser ibai jurila khuret lir.

Pa den nisung kari danga sen, kiojen aser alirongsen dak sentakba nung shishilemba inyakra ajibo pei kisüing khu asütsü.

Sd/-
Mr. S. M. Tzüdir
Chairman, Tzüdir Kidong

Sd/-
K. M. Tzüdir
Kidang Kimang Nungi

DIMAPUR DISTRICT AO PENSIONERS TELONGJEM

Dimapur - 797112
Nükjidong : "Telongjem aser Teyaritep"

PRESS RELEASE


Dimapur, Niuland aser Chümoukedima Districts Ao Pensioners meet.

Dimapur Ao Baptist Arogo (DABA) ajanga ayonga aser ajayanga Dimapur, Niuland aser Chümoukedima District asem prongla nungi Aor pensioner meet sentong tajung ka October 5th, 2024, mapang 10:00 am nungi 12:00 noon tashi DABA main Church, Duncan nung akatsü. Wb. Imnatoshi Longkumer sentong lenir, Wb. Imti Jamir President Dimapur District Ao Pensioner Telongjem tayongzükba O aser Wb. Imtatsung Imchen, O jembir asütsü.

Tanabuba sentong Wb. Maongtoshi aser Wt. R. Imsusenla Jamir lenisüba nung metetpela, pelatepba, sempetlep salaba aser lokti chiuongba mapang alitsü.

Anungji Dimapur District Ao Pensioner Telongjem (DDAPT) mendenti nungi District asemprongla nung aliba Aor Pensioner aser senior citizen ajak (apuni medema) arua atentsü pelashishia jaoker.

Sd/-
IMTI JAMIR
President, DDAPT



TINU JAMIR
G. Secretary, DDAPT


OFFICE OF THE DIMAPUR WAROMUNG SENSO TELONGJEM

DIMAPUR - 797112 : nAGALAND

SANGDONGER

Wb. Salangtoshi Cashier DABA S/o S. Limameren, Dimapur waromung Senso Telongjem dang pai DABA inyakyim nung aibelenogo ta 28th September 2024 nu nangzük nung, Dimapur Waromung Senso Telongjem-i temzüng Ocet-13 nung ajemdaker yimtsür yimer nem tenüing menük bener arutsüba atema Rs. 50,000/- senchi chia merenshiba sangdonger.


(MAPUMEREN)
President
Dimapur Waromung Senso Telongjem


(TEMSUMEREN)
General Secretary
Dimapur Waromung Senso Telongjem

Ireland-i otsütsüsa tang mezüngbuba T20 asaya ka nung SA kokogo



Rongjui/September 30, 2024 (Agencies): Deobarnü Abu Dhabi nung Ireland-i tanabuba Twenty20 international asaya nung South Africa team run 10 agi kokogo. Iba asayamung nung team anapronglai asaya kaka kokogo.

Tebur T20I asaya nung Ireland-i tang mezüngbuba South Africa team kokogo. South Africa team-i mezüngbuba T20I asaya ya wicket ti agi koker liasü.

Asaya nung Ross Adair-i ball 58 nung run 100 yanglu, koba T20I asaya ka nung Ireland nung asayartemi century tasembuba yangluba liasü. Sheikh Zayed Cricket Stadium nung mezüng batting

amentsü maongka agütsüba sülen Adair-i kanga junga asaya par team-i asayar 6 out sür run 195 yangluba nung teyari agüja liasü.

Ireland team-i asaya kanga junga tenzük aser Ross Adair aser captain Paul Stirling na senteper run 137 yanglu. Captain Paul Stirling-ia run 52 yanglua liasü.

Kasa mapang nung Adair-i iba asaya nung six teku züka otsü tasen ka yangluogo. Taoba mapang Stirling-i asaya ka nung six ti züka otsü tasen yanglur aliba pai ajateta otsü tasen ka yangluogo.

Run arishiba mapang South Africa team-i kanga junga asaya tenzük aser top order temi kanga junga asaya

run meneptsü ta bilema liasü. Reeza Hendricks aser Matthew Breetzke napronglai run 51 yanglu aser Ryan Rickleton-ia run 36 yanglua liasü. Ajisüaka Ireland nung bowler Mark Adair-i over pezü nung run 31 agütsür wicket 4 agia parnok nokdanga liasü.

Tongtibang batsman Tristan Stubbs (9) out asüba sülen South Africa pur asayar 4 out sür run 157 yanglur aliba mapang parnok indang innings chirep aser parnoki asayar 9 out sür run 185 dang yangluteta liasü.

Team ana ya maneni Bodhbarnü nungi tenzüka Abu Dhabi nung ODI asaya asem asayatsü renema lir.

NSF MM Trophy result:

1. Asufü Christian Institute-i tie-breaker nung goal 5-4 agi Red Scars Football club kokogo.
 2. Sechii Zubza FC-i goal 2-0 agi F4C Academy kokogo.
- October 1 nü asaya:**
1. Asufü Football Academy vs Michazou FC @ 2pm
 2. Circle FC Chedema vs Tangkhul Kaamna Saklong @ 5pm.

Fitness mejungra contract agintsütsü: PCB

Rongjui/September 30, 2024 (Agencies): Pakistan Cricket Board (PCB)-i, centrally contracted asayar 6-7 nem tekümdangtsü metetdaksüogo aser parnok dang fitness jenjang tajungba kuma yanglushiang mesüra contracts agintsütsü ta shiogo. Pakistan team fitness trainer aser physiotherapist temi Hombarnü Lahore nung tetendanga ka agitsü. Asayartem kari iba ita tetenzüklen agiba tetendanga majangtetba sülen Hombarnü ano agishitsü lir.

“Asayartem shirnok central aser domestic contract ngua lir parnok dang fitness dak sendakba nung kecha hai haura makatsü aser team indang fitness expert temi lateta toktsüba benchmarks kechi südir süaka atongtsüla ta shiogo,” ta board züngsem kati ashi.

Ketdangsurisa, bendanger coach Jason Gillispie aser Gary Kirsten nati PCB mendenbuba dang fitness dak sendakba nung asayar shinga nema talila tajangzük magütsütsüla ta shiogo, ta ashi.

Fitness tetendanga ya stamina, endurance, muscle strength aser tanga tongtibang tenüngdaksütem tendangtsü asoshi lir.

PCB-i 2024/2025 atema

central contracts agitsü asoshi temsüa aliba asayartem mesangdongi lir, koba yimya agi July ita sangdonger aser July ita tashi aoer. Taoba kuma board nung lenirtem melenshiba ajanga iba osang ya September ita-ang sangdonga liasü.


Taküm board-i tang asayar 27 aliba nungi asayartem ajemtsütsü akok ta bilemer, kechiyong coach tasentemi asayaba yimya aser asayartem yimayimpong dak kanga rangloker inyaksangshidar.

Ketdangsur-isa, asayartem shirnoki taküm kum tetenzüklen fitness tetendanga majangteti liasü parnok nem ita ana agütsüogo aser Hombarnü agitsü aliba tetendanga ya iba nung shilem ka lir, ta ashi.

Pakistan team ya tanga international team tem den medemdangra fitness jenjang majungba atema aiben aija aruogo.

Taoba kum India nung World Cup asayaba sülen team director Muhammad Hafeez aser taoba captain Misbah ul Haq nati taoba coach Mickey Arthur aser captain Babar Azam nati trainer tem dang fitness dak sendakba nung asayartem menongshitsü aser parnok asaya dak rangloker asayadaksütsü shia liasü, ta ashi.

Antoine Griezmann international football asaya nungi anener



Rongjui/September 30, 2024 (Agencies): 2018 kum World Cup akokba Francee nung asayar Antoine Griezmann-i Hombarnü sangdong ka ajanga pa international football asaya nungi anenba sangdongogo. Linük tenüng nungi kum 10 asayaba sülen pa tang asaya nungi anener.

“Tajangshiba sünga bener ni kü taküm nung iba chapter ya shibanger,” France vice-captain Griezmann-i X nung zülutsü.

Atletico Madrid forward ya 2014 kum March ita mezüngbuba France team nungi asaya aser pa linük tenüng nungi 137 ben asayaogo. Pa ya linük tenüng nungi timtiba asayaba asayartem rongnung taoba mapang teammate Hugo Lloris (145) aser 1998 kum World Cup

koker alisa Lilian Thuram (142) na sülen tasembuba jenjang nung lir.

Kasa mapang nung Griezmann-i France atema goal 44 idaktsür lir aser pa ya Olivier Giroud, Thierry Henry aser tang team captain Kylian Mbappe nung sülen linük tenüng nungi asayartem rongnung goal timtiba idaktsüba asayar pezübuba lir.

2018 kum Moscow nung World Cup final nung Croatia goal 4-2 agi akokba asaya nung paia goal ka idakja liasü. 2016 kuma Euro asayaba mapang France team final tonga asayaogo aser iba mapang pai team asoshi teyari tulu agütsü aser pai goal trok idakja goal timtiba idaktsüba asayar liasü.

2022 kum World Cup final tonga asayaba mapanga Griezmann-i tongibang shilem

agiogo, ajisüaka tia maka final nung Argentina den penalty metsütepba sülen parnoki asaya mekoki liasü.

Pa linük tenüng nungi tatemsa Euro 2024 nung shilem agiogo, saka junga masayateti tembanga liasü. Iba asayamung nung parnok semi-finals tonga asayaogo.

Griezmann France team nungi tatemsa UEFA Nations League nung iba ita tetenzüklen kidang Belgium den asayaogo, koba parnoki koka liasü.

Griezmann-i asaya nungi anentsü telemtetba agiba sülen France team nung era ka tembanga tali jangjatsür.

Lloris aser centre-back Raphael Varane naprongla 2022 World Cup tembanga sülen international asaya nungi anen aser Varane-bo arishi kum 31 buba nung taoba hopta asaya nungi anenogo.

Kasa mapang nung Giroud-a taküm Euro tembanga sülen linük tenüng nungi asaya anenogo.

Coach Didier Deschamps-i, Israel den Budapest nung October 10 nü aser anogo pezü lir Belgium den Brussels nung masaya tsüngda Bresthostibarnü France team sangdongtsü.

Carles Cuadrat-i East Bengal FC coach mapa toktsüogo

Rongjui/September 30, 2024 (Agencies): Indian Super League club East Bengal FC-i sangdong ka ajanga parnok indang head coach Carles Cuadrat-i mapa toktsüba metetdaksüogo. Season junga metenzükletba sülen pai mapa toktsüogo.

Cuadrat-i mapa toktsüba sülen pa melena Bino George interim head coach asütsü shimogo, ta kasa sangdong ajanga metetdaksü.

East Bengal pur kum 12 tashi takok ka danga mongui arua aliba Cuadrat lenisüba nung parnoki taküm January ita Kalinga Super Cup title bena liasü. Pa lenisüba nung team-i iba asayamung dak alaka tanga asayamung kecha kokteta mali.

Super Cup akokba den külemi pa lenisüba nung East Bengal team taoba kum Durand Cup nung tanabuba jenjang nung tembanga liasü.

“Mapang talangka lir Coach Carles lenisüba nung teami Kalinga Super Cup title abenba

aser AFC continental tetoktepba nung shilem agitsü maongka ngutetba atema Emami East Bengal FC management-i pa dang kanga pelar. Pa tarutsü nung takok tajung nguyonga aotsü imlaja atar,” ta Emami Group nungi Vibhash Vardhan Agarwal-i Hombarnü sangdong ka ajanga metetdaksü.

Spain nung coach ya 2023 kum April ita kum ana atema East Bengal nung aden. Pa lenisüba nung East Bengal team pur 2023-24 ISL nung jenjang tekububa nung tembanga liasü. Parnoki taoba season asaya trok akok, asaya trok draw asü aser asaya 10 nung tamakok ngua liasü.

East Bengal pur ISL 2024-25 season kanga mejungi tenzük aser parnok mezüngbuba asaya asemprongla nung tamakok nguogo. Parnoki Bengaluru FC, Kerala Blasters aser FC Goa makok. East Bengal team ya team 12 asayaba asayamung nung tang jenjang 11 buba nung lir.

BILEMDANGANG

“Timla samara ajak samatsü.”